

西
堂
詩
集

序

余往嘗以

廷試文識展成器之濳遠輒相期以民物之事既觀其所爲詩謬勉以古人之法別去數年復詣

闕下則展成儼然司李右北平有善政余聞而喜之尋展成忝使以詩來余讀之益喜甚曰展成進矣始展成才高學富最長於文詩俊麗特一端耳故與之言詩乃其今詩無復展成也蓋胥韋蘇州之冲雅元道州之疎老杜工部之沉蓄頓挫而爲展成之篇什者也夫三子之詩於唐皆大家而其政術之愷悌人品之磊落忠孝

至性亦可望而知今展成之詩能有三子則亦可追步
古人而克盡乎民物之事如余昔所談說也

聖朝方稽典籍咨儒雅以仕學訓吏三輔之間民瘵甚
吏卽多賢旦夕舉彬彬最當上旨者必展成矣余廢學
不達政術其敢妄附於知展成聊爲數語歸之

順治乙未孟夏濩澤白徹謙拜題

右北平集

長洲尤 侗謨

秋興八首

第一驚秋物空城起暮砧涼風吹急響明月照清音愁
鬢孤燈老悲歌濁酒深寒衣催未就脉脉故鄉心

漢苑芙蓉冷秦關首蓓肥曉風征鴈去夜火獵禽歸漏
永催金柝烽寒照鐵衣淒涼何處笛猶自怨明妃

驅車尋古道一望草離離日落將軍石秋深孤竹祠巉
嵒聞嘯虎老樹隱啼鴟獨立蒼茫外愁覓入楚詞

上國無征戰高臺絕鼓鼙海天銀漢澗山戶玉繩低野

哭和邊馬鄉思逐曉鷄遙憐三五夜少婦夢遼西

画角馳千騎役車走萬家飢寒空野老歌舞自官衙

隔舍

梨園築圃無青草量籌有白沙獨慚彭澤吏送酒醉黃花

公事清香了刑書秃筆無早衙來鳥雀晚食斷樵蘇只
看西山爽還披北海圖高樓凝絕處南去白雲孤

江南皆赤地河朔半洪波天意已如此人生將奈何歲
華黃葉下世事白霜磨試問虎溪月猶聞子夜歌

榆關秋氣老日色自昏黃牧馬嘶圈地行人說戰場挽
弓看射雉投筆想封狼所事不如意吟殘雁數行

喜家人至二首

布帆無恙挂吳天，碧幃相隨度塞煙。
角枕錦衾常夢裏，雲鬢玉臂驟燈前。
君攜鄉思窺鸞鏡，我話羈愁捶馬鞭。
試聽搗砧聲永夜，征衣幾處怨離絃。

別離屈指日三百，行役關心路四千。
紙上加餐頻見字，衣間減帶已經年。
歡欣初看趨兒女，涕淚翻因聽管絃。
今夕三星同有夢，江東雲樹晚秋天。

遵化道中行雪

霜天凜冽射戈矛，千里彤雲画塞愁。
一路曉風當馬首，四圍殘雪滿山頭。
祇看鴻雁征人字，誰取狐狸公子裘。
衰草荒原淒絕處，健兒偏喜試鷹鞬。

除夕懷二親

僕馬風塵再歲除，寄身傳舍卽吾廬。
老妻久醞椒花酒，兒子初臨柿葉書。
邊塞官廚饒野鹿，故鄉土物憶河魚。
寒宵莫更圍爐守，爲待燈深夢倚闌。

班春

盍往觀乎士女呼，東皇鹵簿入幽都。
蜃樓海市陳兒戲，鼙鼓村粧舞老巫。
花柳有心爭欲笑，風沙無力已堪驅。
天公早賜黃綿襖，萬戶飢寒鄭俠圖。

賦得絕塞愁時早閉門四首

孤竹孤城倚朔風，無端孤客此飄蓬。
黃沙吹雨迷班馬，

白草粘天驚斷鴻，亭障幾年荒。守戍田廬，是處付投充。
干戈未已兼饑饉，函角哀吟，落照紅。

霜雪驚心改歲華，關河極目入天涯。全如澤畔無香草，
不及江頭有荻花。獵罷健兒吹觱栗，燈殘怨婦泣琵琶。
清香半燼春寒重，官樹蕭條叫暮鴉。

高樓獨眺四山低，何處將軍桃李谿。白水一干惟飲馬，
黃茅千里不鳴鷄。難將枹鼓驅羣盜，愧乏絲毫補子黎。
漫道長安同日近，帝城望斷五雲西。

重關疊嶂接層臺，獵獵悲風往復回。白屋萬家野老哭，
紅塵千騎大人來。邊情試射堂前柳，鄉夢閒尋渡口梅。

北馬南禽何限恨檀槽消盡綠毫盃

登景忠山禮碧霞元君

磴道盤盤七十二板車宛轉似猿捫羣峰皆作兒孫立
絕頂應知天姥尊夜月靈旗招五嶽春風社鼓走千村
迎神擬續離騷曲欲薦湘君乏蕙蓀

憇石洞留示別山上人

石洞陰森小有天別公卓錫此安禪鉢龍夜靜歸山雨
野鴨秋高起海煙玉磬每聞村照裏蒲團忽掛御爐
前借言樹下無三宿面壁因何歷九年

登五峰山謁韓文公祠二首

五峰青不斷引入白雲中春後山厓雪朝來海上風三

鈎菩薩井

祠後有泉三口

一尺大夫松

石線逆松長僅尺許寺僧云已數十年矣怪

石排如筆森嚴拱鉅公

先生高坐處北斗逼山寒松柏疑玄冢芙蓉捧絳壇塞

雲浮雉堞海日照欄杆把酒空冥外茫茫起百端

寄懷高二亮先輩

吾代高常侍行吟放海陽十年老松菊三徑似柴桑春
鳥鳴箏柱山花照筆牀自知俗吏苦不上使君堂

送宋明府之長洲

楚國人如玉吳宮縣似花錦帆迎賜履香水繞官衙去

路春風發垂簾白日斜清明隴上雨麥雉幾村家

花朝前一日積雪早發沙河

出門猶未曉歷歷辨前途天地同虛白山川半有無寒
威餘鶴氅艷色起花膚爲報田家瑞春風好荷鋤

陪周伯衡黃門游一柱峰釣魚臺和韻二首

偶然走馬看花回却喜登臨接賦才山勢遙吞射虎石
水聲長繞釣魚臺風吹古墓無人到月白高樓有鴈來
彈指春光半零落誰教輕放掌中盃

平生蕩槩在江涯載酒河干忘日斜疑有山僧點寺石
只無村女浣溪紗渡頭客散空流水馬上人歸滿杏花

紫塞東風暫行樂巖城燈火又悲笳

送毛明府之吳縣

毛生初捧檄此去若登仙官閣垂楊柳山塘簇管絃一
簾臯市雨雙袖洞庭煙白馬吳門外相迎宓子賢

虎頭石

將軍射虎陽山下視之石也虎所化至今石虎尚爭獍
當日將軍何叱咤數奇不遇高皇封時去反遭醉尉罵
世上誰無萬戶侯過此張弓不敢射

登山海關澄海樓觀海

茫茫望羊向若歎大哉歸虛渺無岸近視爭看白馬奔

遠觀不辨青霓斷似雷非雷聲砢礫魚驚顛倒騰千軍
駭浪乍浮出地日驚潮翻射垂天雲方丈蓬瀛疑尺咫
漢武秦皇心欲死蜃市蛟宮有若無瑤臺瓊闕非耶是
飄飄我亦凌雲游海風吹搖城上樓援琴爲奏水仙操
鼓櫂不見漁翁舟東望獨存姜女墓精衛填成血淚注

縱使銀濤萬丈高不到墳頭草青處

墳在水中央與波上下

西行更

上海神祠羅襪凌波來幾時

神像浮出海中

霧髻煙鬟光窈窕

夜深鼙鼓舞馮夷土人指點先朝事十年以前風景異
關上皆屯細柳營牆邊亂走桃花騎水犀之師蔽輪舳
木牛之儲銜舳艫鐵甲將軍吹鬢栗胭脂小婦醉醅酥

只今眼中一事無寒沙蕭蕭雁飛疾仰頭屹對長城孤
惟有滄海依古在滄海尚變桑田枯而我感歎何爲乎
登孤竹城拜伯夷叔齊祠堂

孤城鬱岩甍臨河激寒響清風繚繞之白雲翔其上中
有古賢人端然肅遺像社稷已丘墟精神自天壤金石
永令名俎豆芬將享勁颺廻頽波頑薄興慨慷我來北
海濱欣對西山爽駐馬俯平疇陟階掃荆莽百年喬木
堅三春芳草長高臺聞鳥啼遠水明漁網撫景迴幽瑟
披襟頓超朗薄宦亦苦饑懷古用自廣行行歌采薇寤
寐佇遐想

寄汝寧徐司李

去年同走長安道十月霜風三月草我今匹馬向遼西
君在橫溪天半渺別時荷葉綠如裙又見葵花刺繡文
倘上嶺呀極北望相思愁絕塞門雲

聽劉山人鼓琴

官衙蕭瑟如秋水高樓晝靜琴聲起南山當戶石泉流
雷雨忽來搖素几夜月茫茫蝴蝶夢春風澹澹梅花弄
漁歌樵歌續楚歌停絃更亂顏回慟誰歎彈者移我情
昔日潁師今劉生邊聲哀壯擊金鐵城烏驚啼牧馬鳴
我亦從之聊一作羈愁變入江南樂燈光半滅星河落

空庭獨唳遼東鶴

子有
一鶴

苦雨行

去年大水禾大無今年雨下如懸壺五日十日日繼夜
道路之間成江湖城隍不浸者三阪殆哉民其爲魚乎
擊鼓沉牲祝河伯囊沙塞口馳渡夫老農一手計無出
荷鍤奔走空號呼草入大水化爲萍木入大水化爲梟
小舟牽在岸上住大廈飄搖猶乘桴不獨汝曹懼此厄
雖我官舍無休居屋瓦皆震四壁裂東西南北胥沾濡
挑燈兀立夜不寐束書卷衣紛妻孥明朝雨止坐太息
天公何毒此一隅去年田無米今年家無廬無米飢欲

死無廬逝將徂壯者散而之四方老弱必轉乎溝渠曷
不雨粟并雨珠恒雨水若人何辜傳聞江南又苦旱赤
地千里雲漢圖吁嗟乎雖使大禹復生可奈何維揚白
壤冀泥塗

送石仲生太史督學江南

幾年視草高三館此日傳經滿六州芍藥堦前新月旦
芙蓉城裏舊風流季常絳帳開金馬太乙青藜照斗牛
南國江山芳草麗後堂絃管註春秋

偏涼汀登眺二首

獨凭虛閣俯灤河蕭瑟涼風襟帶過不斷青山趨雉堞

忽來白浪出漁簑夕陽背隴牛羊下秋草平沙鴻雁多
四野荒蕪村舍少十年回首幾干戈

此地風塵埋斷碣當年歌舞醉芳茵荒丘剩有松楸在
廢屋行於鳥雀親秋水覺多濠濮意田家時似武陵人
峴山竟鬼應相憶俯仰興衰一愴神

故高大司馬別墅

九日同沈旭輪夫子羅芸臯太守王心海總戎登

一柱峰再和前韻二首

去去方舟聯騎回登高誰繼大夫才只今歌舞盧龍塞
何處江山戲馬臺寒菊一叢隨客老怨鴻萬字背秋來
相逢半是東南侶莫惜風前數引盃

望斷楞伽水一涯行春橋傍画船斜笙歌子夜猶燈火
士女輕粧雜縠紗絕塞自來饒白髮故人相對祇黃花
且堪痛飲添悲壯艤艤當風疊鼓笳

九月大雪

九月江南未授衣千門塞北雪霏霏高樓有客鄉愁劇
猶認西風木葉飛

自玉田至薊州

四山白雪照平川今日方看種玉田雁足拖來遼海雨
馬蹄踏去薊門煙射鵬一騎黃雲裏驅犢千車紫陌邊
眼底崆峒高百尺何時訪道向巖泉

過都城

城中鳳闕瞰平疇
城外行人望帝州
玉水有無殘雪映
金門隱現瑞煙浮
千官競直紅雲曉
萬騎初開白羽秋
最是舉頭凝絕處
苑西深鎖洗粧樓

和涿州郵亭詩二首

詩云棄子拋夫咽
北風驅馳心逐曉
雲空此身一死非
難事惟戀今生竟
夢通已丑冬日晉
中薄命妾徐

淑題

翠黛黃裙逐曉風
汾雲回首鳳樓空
只留蔡琰題詞在
那得秦嘉書信通

馬上琵琶彈北風匣中半鏡舞鸞空柳枝已折沙叱手
舊夢巫山何處通

劉何實恤部招同胡蒼恒徐淡巖諸同寅夜飲聽
小史絃索

薊北風霜經幾年江南舊雨客燈前綠樽翠杓須同醉
白雪紅牙正可憐孤館殘更星在戶萬家哀杵月當天
歸來永夜添鄉夢半擁征衣寒未眠

登保陽大悲閣

獨來登梵閣極望俯平堤寒日三關迴晨煙萬屋齊莊
嚴瞻寶鬘妙密想金篋大士應悲我津梁疲馬蹄

同何寔登十方院閣手譚二首

落日到空門滿塔殘雪存一僧香火寂百歲石碑昏
睨迴層嶂車輪軋遠村登高千里意久客自傷寬

入門只屨二坐隱已忘吾寺僻虛鐘鼓天空足
畫圖青溪寒日映紅樹早霜枯若問西來意郎山半有無

雪後再同胡蒼恒呂子菴張獻昂諸同寅集何寔
署中

鸚鵡盃前倒孟公鴛鴦絃底出秦宮酒壚未減旗亭雪
歌扇依然渡口風聚影天涯同候雁斷腸人事半飄蓬
懸知別後能相憶明月關山千里中

通州口號二首

通州新俗小燕京車馬東西躐踐行好似江南瓜步夜
滿街燈火管絃聲

東涼美酒琉璃卮南部新聲琥珀詞笑昵倡姑唱邊調
參差醉殺滿州兒

馬上見五首

錦鞞窄袖研黃裙小隊紅旗娘子軍更把琵琶着雙手
誰人不看画昭君

雙纏寶樹兩垂環對挽烏雲菩薩蠻生長臙脂山下住
黃沙影裏照紅顏

錦繖夫人帶木蘭健兒行酒帳房前可憐今夜遠西月
淺草茸茸隨意眠

慣點酥醃醉肉屏

北人呼駝
駝爲肉屏

便藏金屋也娉婷呢喃耳

畔渾難曉只作雕梁燕語聽

長隨不及羽林兒馬首相逢只片時歸去千金尋妙手
名香淡粉寫闕氏

同年宣城李煌以萊州司李署守膠州死海時行
之難詩以輓之

汝佐東萊日年方弱冠餘清香時繞戟碧血驟沾裾業
及秦黃鳥殤成海大魚 聖朝褒卹異照耀史臣書

大雪三屯道中

大雪深三尺，籃輿過萬山。
半天開玉宇，一夜白人間。
閉屋煙常斷，空林鳥自還。
無衣誰共賦，哀雁滿榆關。

癸巳除夕

塞垣風雪日紛紛，官舍寒燈惜歲分。
直北飛鴻真遍野，向南征馬尚從軍。
竟銷京國三年雨，夢繞吳山萬里雲。
鄧尉梅花應折得，祇將哀怨笛中聞。

散米謠

一叟扶杖拄一嫗，倚門佇一夫。
趨簷楹一婦，隱庭柱手。
中提一男，懷中襁一女。
一農又一工，一商又一旅。
一漁

又一樵一衲又一羽跛者步槃跚駝者立偃僂喑者呼
鳴嗚瞽者行踽踽疋者貌立黃裸者身藍縷寡妻逐鰥
夫孤兒隨獨父或操篋與瓢或攜筐與筥或以破帽盛
或以弊衣取或挈瓶托鉢或將雙手舉左去右復來前
推後還阻數一以至十至不可勝數丁男四千餘丁女
三千計誰爲算博士分明點鬼簿小吏在傍立往往識
爾汝某也田舍翁某也市門賈某也弓之子某也褐之
父某裙而某釵蕭娘及呂姥疇昔大有年各能立門戶
飢則食肉糜寒亦被絛紵一旦遭凶荒死亡十去五壯
者走四方弱者守此土聞有發粟令百里爭趨府可憐

良家子乃與乞丐伍性命且不保廉恥何足語朝幸有
米炊暮尚無薪煮今日更明日却愁空廩庾予顧太守
歎大無豈小補甲哺不及乙辰飽不待午窮官千日糧
窮民一日肚欲竭升斗儲衙內魚生釜雖竭尚方租難
噓寒谷黍欲繪飢民圖獻之上帝所大發萬千倉散爲
天下雨

一春

一春忽已去懷抱幾時開塞北花難見江南雁未來寒
沙吹古戍落日照荒臺無限憑高意黃昏鳥雀哀

紀賑

朝驅北平東暮馳北平西問君何所行奉 詔賑災黎
使者上頭來千騎壓城堤箕踞高堂上意氣吞虹霓金
盤羅几席椎牛烹黃牴官長左右立指揮似童奚百工
盡奔走執役到鳴鷄鑿銀細如粟權衡慎毫釐赫蹠重
封裹筐篋與山齊大示張通衢遠近爭扶攜一口散丁
夫二口散丁妻子女三四口半口及孩提七十賜疋布
老人學兒啼前行旣匍匐後至還推擠號哭填街巷穢
臭聞堂基哀哉餓鬼道形狀同牢陸握紙不盈掬珍重
如琉璃此行良不易跋涉更山谿昨日至今日明日候
期期供作數日糧空手歸田畦吏呼方咄咄婦歎仍凄

淒嗚呼小民苦堯舜病難醫閭閻分芥子內府破須彌
後宮減紈綺 至尊徹鹹醢巖巖廊廟臣爲爾徧輪蹄
大吏口舌敝小吏筋骨疲栉沐風雨中面目等黃泥豈
敢辭沉瘁但願慰調饑使者乘傳還戶口滿箱齋入朝
告 天子咨嗟歎靡遺祈穀顙上帝雨粟先京畿今年
大有秋努力勤耕犁我勞將如何高臥且持願既足弄
清流沐髮乘陽曦僕痛馬玄黃牧之南山蹊

生年不滿百

生年不滿百夢寐居其半燈火作黃昏鳴鷄忽清旦出
入營簿書俯仰進餐飭往者不可追來者焉能算日月

不我留。颺如車輪轉。誰能驚精神。長短供愁歎。愁歎亦何爲。促迫事婚宦。蛾眉無常好。貂蟬無常艷。竹帛已塵土。何況筆與硯。所以老氏言。有身大爲患。人無養生主。不如松柏幹。

成梁

遙傳白駱下。盧龍秋水排。天起彩虹河。伯不仁。瓠子渡。將軍跋扈石。尤風誰呼烏。鵲填銀漢。試駕青鳧。建碧宮。築橋未成。因更造舟。我似客星犯牛斗。朝朝暮暮大河東。

除道

東巡警蹕動千閭。候吏戈殳親掃除。五色雲霞開御道。

右北平集
四方風雨衛行廬紅塵隱約蒼龍馬青草徘徊白鷺車
萬騎雕弧還羽獵獨慚無賦似相如

駕止東巡有賦

昭陵松柏朔雲邊 聖慕深宮已十年春露初聞除寢
道秋風旋遣罷樓船爲哀萬國多戎馬還念千村廢阪
田何似穆王驅八駿空歌黃竹白雲天

有感

蟋蟀驚秋早哀吟入夜深孤燈荒塞夢明月故鄉心疲
馬悲長道寒蟬感暮林青山回首處豐草自森森

捐俸

詔以諸臣俸賑茲百姓飢可憐五斗米能飽幾家脾奴
僕憂煙火兒童望棗梨老夫方嘯傲采菊且支頤

黃花

黃花不厭冷萬里共邊庭愧爾三秋意消余十日醞高
樓雪映白遠岫雨來青楚客空餐菊江潭尚獨醒

送張明府之蘇

薊門霜雁動高秋紫馬朱旗發上頭十月寒花迎画戟
五湖春水汎仙舟攜來卷軸羅青案到處絃歌擁碧油
此去好栽張緒柳蘇州刺史本風流

劉明府募流民實遠左擢嘉定令有贈

天子歌風思故鄉書生沐雨送流亡魚軒革乘遷漕衛
華轂朱輪寵范陽一水平分吳市練千家盡種武陵桑
江南亦有哀鳴雁還望仁君賜稻粱

送師明府之崑山

父母歌何在欣還得我師鳧飛香水近馬度玉山遲桃
李迎潘岳桑麻擁杜詩有時過角里應食漢青芝

酌酒慰彭雲客

誰肯遠尋窮塞主故人下第在長安三年雨斷成新夢
九月風高近小寒燕市且教歌慷慨荆山何必涕洟瀾
朱門日報彈冠客醉倚離騷白眼看

喜門人徐公肅鄉薦

有美崑山玉樹柯南州孺子未應過烏衣門第談王謝
綠髮年華看阮何自有文章傳館閣直須意氣動關河
長安車馬尋常事莫學琵琶大道歌

聞公肅捷感念亡友湯卿謀

夫婦偕亡已十年更添幼子伴重泉空遺玄草埋文塚
未買青山築墓田碧落紅簫知在否寒冰哀笛正淒然
喜聞洗馬乘龍日應續中郎第一絃

六如詩

夢

日來行坐夜來眠鼓吹羊車總偶然萬戶邯鄲金玉相
六宮巫峽雨雲緣黃沙秋草熊羆地紫禁春風蝴蝶天
一宿願同菩薩覺揚州杜牧已三年

幻

萬物芸芸盡化人壺中日月壁中身鸞籠枕障秦宮艷
蜃市樓臺漢苑新碧海黃塵真迅速白衣蒼狗且逡巡
君看傀儡堦頭弄贏得兒童也笑顰

泡

逝者如斯老歲華漫勞漚沫起生涯本來是水名非水
究竟無花似有花四海雄風翻白浪百年遺跡逐黃沙

世間萬擾緣生滅生滅俱忘且喫茶

影

大地山河一鏡空形形色色定誰工
煙雲歌舞花前月風雨危疑盃裏弓
狂士纏鬚笑水白美人擁髻泣燈紅
無明慙惑從明造至道元來在閻中

露

青春白髮五更寒弱柳新桐淚未乾
唐室干戈生玉樹漢家陵闕入金盤
鬼歌薤上悲秋暮客賦蕭斯感夜闌
好去爲霜辛苦意高臺曉日照花殘

電

許大青天難掩藏，剎那白地便銷亡。伊周事業千金色，
李杜文章萬丈芒。豈有光華爭日月，何須意氣射風霜。
浮生流火成飄忽，剔起禪燈照十方。

三河

大風飛萬里，朔氣繞三河。老樹叫山鬼，黃塵揚海波。
策鞭行且止，問渡夜如何。誰似京周道，皇華四牡歌。

再過都城遙望天壽山諸陵

黃霧交兵日，青天落帝星。銅駝辭漢殿，鐵駟起秦庭。
楊柞新豐闕，松楸古墓扃。雲煙銷壯氣，雷雨護幽冥。
石馬嘶黃土，銀狐舞翠屏。珠襦藏玉匣，墨本閱蘭亭。
田豎耕

犁亂旗軍獵犬腥宮花春化蝶野草暮飛螢酒掃無三
戶經營空五丁鼓吹總帳寂弓劍漆燈熒泣竹湘妃怨
啼鵲望帝靈江頭攀細柳塔下哭冬青離黍歌猶咽秋
梧夢未醒昭陵重騁望涿鹿暫車停麥飯盃羹斷金盤
涕淚零山陽風弄笛棧道雨淋鈴行役思千里興衰感
百齡蕭蕭易水上擊筑寫哀銘

夜投天寧寺宿

昏黑應須到花宮接雉壕鐘鳴寒月靜鈴語夜風高千
里獨爲客一官何太勞誓當依淨土破衲補征袍

定興行雪

身似銜蘆雁年年帶雪飛一車兼兩馬千里繞京畿
冰介封紅樹瓊花繡白衣山中高臥客正自掩柴扉

保陽道院

關河常逆旅宮觀暫幽居閱世人情破觀心我見除翻
書午飯後追夢曉鐘餘感慨從何起浮雲任卷舒

謁楊椒山祠

諫草留遺石年年化碧痕悲風吹古木大鳥叫祠門青
史平生事丹楹故國恩永陵北望在流涕向黃昏

早發蘆溝橋

蘆溝曉月起征鴻撲而寒沙捲朔風萬騎腰弓爭上下

千牛背草塞西東紅雲縹緲神京外青火蕭條戰壁中
跼馬周原增悵望不禁霜露濕蒙戎

再遊天寧寺

古刹先朝外道場三千精舍贊公房綉幢翡翠遺宮線
寶鼎芙蓉隱御香虛殿蒼茫搖落日老僧寂寞倚寒霜
關山百戰多荆棘處處伽藍似洛陽

草子

小草能生子天心在救荒不堪田鼠食且作野人糧
炎火從投畀南箕借歟揚誰家工稼穡萬廩鎖黃梁

反昭君怨

不成爲漢后便去作闕氏亦足當人主還能殺画師琵琶彈毳帳酥酪醉金卮強似長門裏秋風老黛眉

別山上人貽詩兼寄画菜和荅

曹溪吸不乾別山推不倒拈花笑固佳画菜看亦好我有一大事急欲從君討佛法不怕爛來年尚爲早

甲午除夕二首

遼海思依依三年尚未歸天涯人北望日暮雁南飛紫塞青衫敝高堂白髮稀宦遊徒拓落簡點素心違

官間無俗事客久有離思千里登樓賦三年出塞詩閨人裁栢葉稚子画桃枝且話團圞樂春風不定時

元旦拜闕擬早朝詩

景陽鐘動曉星斜十部鑾儀擁翠華金殿天顏光日月
玉河春色起雲霞禁城車馬羅千陌海國衣冠會一家
朝鮮國王入覲獨滯邊關成外吏稱觴遙望上林花

煮粥行

去年散米數千人今年煮粥纔數百去年領米有完衣
今年啜粥見皮骨去年人壯今年老去年人衆今年少
爺孃餓死葬荒郊妻兒賣去遼陽道小人原有數畝田
前歲盡被滿州圈身與庄頭爲客作里長尚索人丁錢
庄頭水滂家亦苦驅逐傭工出門戶今朝有粥且充饑

那得年年靠官府商量欲向異鄉投攜男抱女無車牛
縱狀跋涉經千里恐是逃人不肯收

出關行

出關去往遼東 詔徙十萬填新豐五陵年少走如風
黃金白米青絲籠招呼村市爭來從白頭龍鐘扶老翁
紅顏伶俜携孩童棧車羸馬送爾去銀章墨綬何雍容
未知爲官善與惡且喜吾民暫喫着巫閭山高渤海淡
日把鋤犁墾磽塉不獨有田堪耕作更避差徭免敲朴
共醉黃酒飯茹茹誰人不說遼東樂遼東厚遠西薄遠
西雖窮是故土遼東雖好流移苦親戚墳墓天一方惜

別臨岐淚如雨玉關生入定何年夜夢猶依舊莊戶昨
日鄰翁寄書還桑麻雞犬各平安但得今秋穀子熟只
教家居莫出關出關容易入關難

憂盜行

寶刀玉靶黃金勒貂帽狐裘紅袴褶相逢只道羽林兒
誰知君是撥九客問客撥九向何處白晝借人九衢路
官軍獲住柰若何宛轉送上京城去京城岩岩虎豹關
八旂披甲聚如山竊語少年且母恐官今大赦放汝還
賦得故人在襄陽寄陳司李

故人在襄陽襄陽芳草長春風大堤曲歌止使君堂解

佩憐神女揮鞭笑，葛疆幾時峴首醉。試向薊門望。

早發七家嶺

邊地悲風苦春來，吹不禁征衣霜露結。驛道歲華深，曉色千村動。寒聲萬馬吟，坐懷官閣上。初日照橫琴。

三過都城

沙河門外草蕭蕭，落日西山影寂寥。空繞紫城尋陌路，祇看白塔起雲霄。天邊大老施行馬，月下孤兒出射鵰。三過長安綠底事，使車不爲午門朝。

我馬二首

關山跋涉久我馬，日立黃楊柳燕臺。隔蒲萄宛路長小。

心臨峻坂哀響入邊場何處黃金絡青樓大道傍
飲馬長城窟誰空冀北羣秋風萬里意曉日五花文未
斲天山草長嘶龍塞雲何年漢驃騎得隸霍將軍

早發舊店聞盜殺人于琉璃河

白日橫孤劍清霜起二毛曉鷄催客去宿雁向人號大
道多荆棘微官止做袍狐鳴何處火昨夜北風高

行次都門寄公車同學諸子

上苑春風花滿欄又驅疋馬度桑乾三年短褐黃塵苦
千里荒塗白日寒南國故人多玉樹北門獻賦在金鑾
誰憐紫闕青山外有客斜陽搔首看

得家大人書并示園居十詠

仲春接得杪冬書，長跪書前問起居。
墟壑正雲山新夢裏，江南風雪暮寒餘。
吳中大寒不減北地故園搖落存詩卷人事蕭條
通歲除不遣孟宗時，致鮮官衙彈繳久無魚。

徐鶴心貽詩見懷漫荅二首

讀罷新詩百感生，雁飛千里暮雲橫。
江南亦有悲歌客，豈獨秋風古北平。

匹馬歸時剪風故人書札到京東，遙卸夜雨生公石。
八月天高聽塞鴻。

飯廬山草庵予憇此者六次矣

抖擻征衣暫解驂齋堂重禮舊伽藍三年六度行千里
白髮頭陀未出庵

擬行行重行行

行行重行行驅馳越千里朝望旭日升夕見明星起宿
鳥歸其巢游子往未已我馬方奔騰我車尚逶迤車馬
莫相離宵征慎行李獨居固寡歡獨行又寡安行止悵
何從霜露摧人顏仰視黃鵠飛安得冲天翰

擬西北有高樓

西北有高樓疎簾當窓垂獨坐撫鳴琴清商流堦墀一
彈庭葉落再彈梁塵飛三彈未終曲涕淚沾裳衣鼓琴

本爲樂如何翻傷悲傷悲君自取琴音無乖違東家公
子行玉手弄金徽薰風正繚繞明月有餘暉四座稱萬
年觴行聲未希

擬迢迢牽牛星

迢迢牽牛星依依河漢渚佳期在秋夕靈車來容與神
仙苟無情上天斷雲雨峩峩蓬萊山渺渺瑤池浦娥娥
一玉人翩翩百花主紅葉有遺香青雀無回羽仰聽天
風吹環珮邈何許十年不得見媒勞信還阻可憐巫山
高朝暮倚神女

七思

并序

僕偃蹇邊關淹留歲月一官掣肘十口捉衿盛孝廉
憂能傷人楚公子憊謹謝客窮魚堪賦瘦馬獨吟每
值閒居登高望遠瞻京室之浮雲睨舊鄉之芳樹未
嘗不悲歌徹座涕淚沾衣願念生不百年所懷萬緒
悒悒不樂何以遣時因追風人之言一曰我思古人
俾無訖兮再曰我思古人寔獲我心人生世上逆境
恆多與時偕極不自我始怨者以之沉身達者安焉
肆志今才不迨古遇與之齊樂天知命雖或難之亦
惟反復往跡差可自廣作者七人悠悠我思各綴四
言述其本末云爾

屈大夫原

我思屈大夫宛若芳蘭草衆人日以茅棄捐在中道秋
風江水澹馨香不自保山鬼哭幽篁湘君愁眇眇

賈太傅誼

我思賈太傅洛陽一少年睥睨公卿上痛哭天子前長
沙翠濕地傷生私自憐帝命妖鳥至哀鳴弔其賢

司馬太史遷

我思太史公奇氣空乾坤吞聲下蠶室萬古稱煩冤武
帝至暴伉漢廷無一言至今龍門水激怒排崑崙

李供奉白

我思李供奉醉草金花箋玉筍娟新聲天香照嬋娟一
朝夜郎空錦綉埋蠻烟惟餘一杯酒搔首問青天

杜工部甫

我思杜工部流離天寶末戎馬灞陵原風雨瞿唐峽苦
死憶妻孥餘生戀宮闕採橡自行歌青春悲白髮

蘇學士軾

我思蘇學士少可而多怪孤舟楚江濱白頭瓊海外戲
筆醉淋漓大瓢歌慷慨五岳方寸間吞吐不芥蒂

楊狀元慎

我思楊狀元翩翩佳公子萬里謫窮荒玉顏老金齒猩

猩啼哀牢淚盡瀾滄水
窈窕深閨人腸斷錦江鯉

吾宗一首送天士家兄歸桐鄉

吾宗推阿大文筆妙京華
夜雨生池草春風吹楊花
兄應登紫閣弟已老黃沙
畫錦吳江路還尋小謝家

昌黎道中苦熱

臥閣琴書整自肩
竭來行部問騶鈴
鳴蟬乍響新榆綠
雉雉低飛小麥青
夏日并途長不已
晚山如睡杳難醒
何時碣石觀滄海
破浪乘風入洞庭

病起四首

不知落葉幾秋風
又見千山紅樹中
病去浮萍仍塞北

夢隨征馬向江東三年刀筆慚無補十口瓶罍嘆屢空
臺上黃金真突兀西看倦眼欲朦朧

自憐多病滯天涯曉鏡清霜入鬢華蝴蝶夢中秋老
菜萸杯裏雁橫斜千村狐嘯驚宵鼓萬騎鷹鞞起暮笳
却憶江南烟雨外黃雞紫蟹好田家

金風玉露早寒初藥竈茶床垂死餘九日重看荒塞菊
三秋不見故鄉書休文病起腰還瘦潘岳愁來髮已疎
欲採芙蓉江上遠榆關何處買鱸魚

獨上危樓思惘然蒼茫平楚接遙天誰家搗練愁邊月
幾處橫戈亂戍烟帝子錦花迷蜀道美人瑤瑟隔湘川

此生只合蒲團老書劍飄零近暮年

訪休上人草堂寺

吾師卓錫鍾山住何事浮杯到北平千里自携木上座
三冬長對古先生庭前栢子垂寒塞蹊上桃花入化城
笑我一官似行脚不妨白社老淵明

賦得邯鄲才人嫁爲廝養卒婦

一出宮門淚萬行金環無分御君王艷歌翻入邊關調
塵鏡猶憐時世粧莫怨卷衣歸細柳誰教挾瑟向昭陽
早知上國蛾眉賤悔不秦樓學採桑

乙未除夕

四見龍山雪依然一敝衣祇應悲老大無事嘆寒微滄
海風波急邊城草木稀逢迎吾道拙耐可返柴扉

君馬黃

君馬黃臣馬玄衆馬齊驅君馬先錦韉珠勒珊瑚鞭一
人徘徊岐路間有馬自西來兩三惡少年蠻鞞狐白裘
箭箠大刀鏢遮君之馬索君錢問汝何人敢作賊羽林
健兒射鵬還汝莫訶後騎來執汝殺之骨肉揚爲灰羣
臣呼萬歲再拜酌金罍臣聞天子出命鑾儀前羽蓋後
雲旗衛官騎士紛追隨黃帝七聖游赤水穆王八駿休
玄池萬乘微行誰能知白龍魚服困豫且君不見驄馬

御史小臣耳行行且止人避之

長安道

長安大道甲天下鬱鬱崇城臨廣野六郡齊驅玳瑁車
五陵爭躍桃花馬車馬縱橫入便門風沙白日蔽黃昏
玉河堤上珠輪轉金水橋邊銅馬蹲龍樓鳳闕排雲霧
桂殿芝宮承雨露曉月遙聞長樂鐘夕陽近辨新豐樹
西山南海擁皇州八部旌旗居上頭侍衛翎垂青鼠帽
將軍爪攫黑貂裘貂裘鸞轡圍塲戲羊酪駝羹帳房醉
春風打翠落金丸秋日呼鷹飛鐵騎錦繡夫人白臯駟
烏孫公主碧鈿車搔頭低插于闐玉繫臂斜封封勾漏砂

吉貝毳毼滿花席小靨燕支鬢瑟瑟楚舞裝成蘇幕遮
秦箏彈出沙陀力城中歌舞徹清霄城外琅璫趨早朝
傳粉侍中初束帶画眉京兆正鳴鑣鳴鑣張蓋日相索
投轄飛觥夜行樂學士花袍出北門公孫布被開東閣
東閣西臺連北寺朝上除書夕彈事爛羊竈下拜中郎
瘦馬途中避司隸八及三君虛角爭五侯七貴盛逢迎
纔見賈生召宣室旋聞嚴助去承明仕路蒼黃真反覆
彈冠襍被同碁局但說司空西第尊誰憐家令東曹哭
九陌三條十二街酒旗燈市篆文牌韓康買藥尋蟬甲
董偃鸞珠貼燕釵襄陽估客持籌老河間姪女數錢好

中山孺子絳襜褕邯鄲少年紫騶裊
相邀解佩宿娼家美人笑折章臺柳
怒馬驕嘶杜曲花
青樓朱幌金屈膝綠鬢紅衫繡袴褶
閒隨公子鬪揮捕
醉調健兒吹感篋感篋蘆笳吹朔天
龍牙犀甲照燕然
橫海樓船下南粵冠軍鉦鼓向西川
去年道通迦毗梨
今年使出高句麗相如馳傳朝印
符博望乘槎定月氏
玉帛干戈紛未已鋒車蒲轂聯翩起
計吏賫書進栢梁
諸生挾冊來槐市亦有江湖慷慨人
悠悠白眼老風塵
乞食吹簫悲自失賣漿擊筑喜相親
入幕那堪邊塞惡
出門漫笑長安樂歲星索米且浮沉
子雲著書還拓落

已矣哉君不見燕王臺空草萊駿馬賢人兩寂寞千載
只有黃金來

附南歸雜詩二十四首

臣罪端宜黜 君恩尚未忘孤愚真木石薄譴豈風霜
素食三年久生還萬里長溪慙疆項令唐突問南陽
去就皆無益微官輕一毛祇成襍被拙敢傲掛冠高白
日吟枯管青山醉濁醪 大朝多濟濟努力贊襄勞
執戟寧辭賤歸田興自遐幾年從簿領每念在烟霞既
放三閭畔仍還五柳家却憐賈太傅辛苦向長沙

聞命卽揮手閒曹易潔身單車去關塞一葉下河津末

秩無餘祿空囊愧老親買山應未得江上好垂綸
遼海風濤惡邊庭日月昏豺狼當道怒魑魅對人尊莫
怨網羅密猶憐皮骨存北方不可往今日爲招魂
北望餘寒日南行及暑天孤舟逢競渡流涕古人賢潮
色生津樹鐘聲散瞑烟斜陽柔櫂外已共白鷗眠
去國非濡滯風當上水舟石尤故相阻河伯若爲留麥
落飛蝗出林空戰馬遊楊人嚴夜柝野泊近滄州
已有愁千斛何須戴石歸虛舟誠自愧關吏苦相譏避
馬離官渡牽船隱釣磯南來笳鼓競鷓首樹黃旂
舳艫衝尾上呼喝盡旗丁淺水難爭涉微舟未敢行崖

高酷日窘聞急亂流鳴夢醒涼生席疑聽瀑布聲
行道夫何遠咨且失路人裹糧空五斗沽酒乏千緡偃
蹇憎奴僕艱難乞鬼神官貧牲醴薄無柰柁師嘆
避暑無長策入林恐不深豈堪乘木坐河大日當心薄
晚飄風發床頭又苦霖聊爲一斗醉漫學五噫吟
南風吹細雨兩漿出黃河遠浦孤城小荒塘古廟多輕
檣低燕雀疊鼓動龜鼉不及吳江畔漁簑款乃歌
跼踖經三伏愁偏五夜中兒啼驚吠犬婦嘆厭鳴蛩買
藥尋韓伯乞漿問薛公悲秋同宋玉無處借西風
小山不可作桂樹尚淮安吾意反招隱王孫芳艸寒淒

涼吹笛賦寂寞釣魚竿水部求金急鷄鳴客度難

秦郵一水國湖岼隱城垣夜雨連江口秋潮出海門採

蓮雙槳艇褰鴨獨家村野宿憎荒草營營白鳥喧

天下銷魂處維揚第一花生憐歌吹路死傷玉鈞斜戰

鼓悲秋草宮鬢平暮鴉風塵我夢覺行種故侯瓜

江水悲無極青山日夜浮長風千萬里細浪一孤舟鼓

枻招漁父揚舲賦遠遊漫勞饒吹曲飲恨滿中流

風雨雲陽驛驚憐少子舳扁舟長此別蕭寺暫羈孤季

子埋嬴博潘郎坎路隅旅魂還北去不肯到姑蘇

未盡逐臣恨重添愛子寃金風摧嫩草玉雪委荒原翠

襟留遺弄青衫續淚痕毘陵三峽路夜夜聽哀猿
我行三月久猶自滯蘭陵風雨橫相妬長年病未能
聲哀濕草人影澹寒燈撲簌驚鷗起漁舟唱采菱

流人空谷喜游子故鄉悲風景猶無恙情懷不自持吳
山開倦眼惠水洗愁眉寄語張羅者烏棲有舊枝

出也本干祿歸與非釣名無辭白妻子一揖謝公卿空
負五嶽志難求十畝耕我生慚命薄不敢問君平

長憂作傖鬼且幸返荆蠻坎壈風霜下悲歌天地間笑
人多白髮愛我只青山舉世無沮溺誰何共往還

乞得餘生在猶堪枕石眠虎丘看月市笠澤賣魚船勿

作有情物常參無諍禪生公見我笑一夢已三年

自壬辰七月至丙申七月止
共詩一百五十七首

右北平集